



BILTEN



DERBY BOSNIA-HERZEGOVINA
COMMUNITY ASSOCIATION

Maj 2018

Izdanje 17



POSJETA GRADONAČELNIKA GRADA DERBY BOSANSKO-HERCEGOVAČKOM UDRUŽENJU

Gradonačelnik grada Derby, Councillor John Whitby, posjetio je Bosansko-hercegovački Centar gdje je upoznat sa mnogobrojnim aktivnostima i projektima koji se odvijaju u prostorijama našeg udruženja.

Pored osoblja i volontera, Councillor John Whitby imao je priliku razgovarati sa mnogobrojnim izbjeglicama i azilantima iz raznih krajeva svijeta koji su se u tom trenutku zadesili u Centru te iz prve ruke čuti informacije o svakodnevnim problemima sa kojim se oni susreću te o značaju postojanja

ovog centra i usluga koje pružamo.

Na kraju, Councillor John Whitby imao je samo riječi hvala za sve ono što mi ovdje radimo i za pomoć koju pružamo svim ljudima širom svijeta bez obzira na njihovu nacionalnost, etničku pripadnost, religiju itd.

ANKETA 2018

Koristili ste naše usluge ili ste volontirali za nas?

Vaše mišljenje je važno. Molimo vas ispunite petominutni upitnik tako što ćete vašim smart telefonom skenirati QR Code na slici ili posjetiti slijedeći link:

<https://www.surveymonkey.co.uk/r/NVRD96K>



JAVNA TRIBINA POTPREDSJEDNIKA BH ENTITETA RS



Ramiz Salkić, potpredsjednik bh. entiteta RS

Ramiz Salkić, potpredsjednik bh. entiteta RS, polovinom Aprila je boravio u trodnevnoj posjeti građanima Bosne i Hercegovine koji žive u Velikoj Britaniji, te na skupovima koji su organizovani, govorio o uvezivanju bh. građana u dijaspori, aktivizmu, učešću u demokratskim procesima, investiranju u domovinu, ali i važnosti njegovanja sjećanja na genocid.

Prva od ukupno tri tribine održana je u našem Bosanskohercegovačkom centru gdje je gospodin Salkić razgovarao sa bh. građanima, te im čestitao zbog velikog aktivizma i zahvalio na pokazanom interesu za stanje u domovini.

Obaveza svih nas je da činimo sve što možemo da naša domovina bude što bolje predstavljena u svijetu, kazao je gospodin Salkić, navodeći kako to naša zajednica čini na najbolji način.

On je također naveo kako je našim građanima neprihvatljiva podjela ljudi po mjestu življenja, jer nas takve pojave samo još više razbijaju, slabe i dijele. Takve pojave mogu biti put u nestanak. Mi želimo da smo svi isti i možemo se dijeliti samo na one koji više ili manje vole svoju domovinu, ali i na one koji više ili manje urade za svoju domovinu.



Ramiz Salkić sa članovima bh. udruženja Derby

INFORMACIJE ZA GLASANJE IZVAN BiH NA OKTOBARSKIM OPĆIM IZBORIMA

Za državljane BiH sa pravom glasa, koji se nalaze na privremenom boravku izvan BiH ili imaju status izbjegle osobe, je u toku registracija za glasanje iz inostranstva na Općim Izborima 2018. u BiH, koji će biti održani u nedjelju, 7. oktobra 2018. godine. Registracija traje do 24. jula ove godine.

Državljeni BiH koji nisu registrirani da glasaju iz inostranstva, a to pravo žele iskoristiti za Opće izbore 2018. godine koriste obrazac PRP1 u čijem sastavu je i uputstvo kako popuniti i koju dokumentaciju obezbjediti i na koji način dostaviti u Centralnu izbornu komisiju BiH. Obrazac PRP1 možete preuzeti sa web stranice Centralne izborne komisije BiH:

[http://www.izbori.ba/.../PRP_1-BH Obrazac za glasanje izvan B...](http://www.izbori.ba/.../PRP_1-BH_Obrascac_za_glasanje_izvan_B...)

Uz popunjen obrazac priložiti kopiju jednog od važećih identifikacionih dokumenata i dostaviti u CIK BiH do najkasnije 24. jula.

PRP obrazac i dokumente možete dostavljati elektronski, slati faxom ili putem pošte:

- elektronski na mail adresu prijavapp@izbori.ba,
- na fax +387 33 251 333; i +387 33 251 334,
- poštom na adresu - Izbori u BiH, Poštanski pretinac 451, 71000 Sarajevo.

Bosansko-hercegovačko Udruženje Derby stoji na raspolaganju svim svojim građanima za pomoć pri popunjavanju formulara, skeniranja dokumenata i dostave CIK-u. Potrebno je samo da nas posjetite i sa sobom ponesete jedan od tri važeća identifikaciona dokumenta BiH (lična karta, vozačka dozvola ili pasoš) i podatke o adresi prebivališta u BiH.

Pozivamo građane da se registruju i glasaju u što većem broju i na taj način sudjeluju, odnosno, odlučuju i kreiraju budućnost svoje domovine i naroda koji u njoj žive.



5 GODINA POSTOJANJA BOSANSKO-HERCEGOVAČKOG CENTRA

Juna mjeseca 2013 Bosanskohercegovačko Udruženje u Derby se preselilo u sadašnje prostorije u 99 Curzon Street. Prošlo je 5 godina, i sve se tako brzo desilo. Mnogo toga se dešava u sadašnjem Bosnia & Herzegovina Centre. U sadašnjem projektu sa Derby Refugee Forum, možete naći mnogo usluga koje obavljamo za naše građane kao i za ljude u nevolji iz cijeloga svijeta.

Centar ima 3 zaposlena a lista volontera je velika, preko 50 njih i puno onih koji se uključuju ponekada za neke događaje i slično. Kroz Centar po raznim osnovama prođe godišnje preko 11000 osoba, što je za ovih pet godina između 55000 i 60000. Prosto da se ne povjeruje! Godišnje preko 4000 savjeta se pruži onima koji su u nevolji. U centru će te naći mnogo toga: savjeti o beneficijama, zaposlenju, upisu djece u škole, zaposlenje, školovanje, treninzi, imigracione savjete, popunjavanje raznih formulara, nastavu engleskog i matematike, predavanja o ovom društvu i integraciji, zadovoljenje društvenih i religijskih potreba, razne prezentacije vezane za život ovdje u UK, škola na maternem jeziku, kulturne aktivnosti, izložbe, obilježavanje značajnih datuma iz naše historije, druženja i još mnogo toga. U toku sedmice većina posjetilaca Centra su klijenti iz cijeloga svijeta i oko 2/3 krstjani, a što nikome ne smeta niti treba da smeta. To je bogatstvo ovoga Centra.

Poznato vam je da je naše udruženje po Statutu člansko udruženje, tako da svi oni koji žele da rade i pomažu u unapređenju Udruženja, treba da su članovi a to dokazuju da su platili članarinu koja je samo £10 godišnje, "jedna kutija cigareta". Time mogu da biraju i budu birani u Upravne organe udruženja preko kojih će doprinositi daljem radu i unapređenju Udruženja. Istovremeno, za dobijanje nekih usluga ne trebate biti član udruženja, dovoljno je samo da dođete u Centar i zatražite ili nazovete.

Način korištenja centra i uslovi su propisani Pravilnikom usvojenim od strane Upravnog Odbora. Kako centar ima svoje troškove koji se moraju plaćati a oni su oko 10000-12000 funti godišnje, time se i korištenje samoga centra naplaćuje, što je regulisano navedenim Pravilnikom, osim ako je to u interesu cjelokupnog Udruženja i tu aktivnost organizuje Upravni odbor udruženja.

Biti porijeklom iz Bosne i Hercegovine ne znači besplatno korištenje prostorija Bosanskohercegovačkog Centra za privatne potrebe, a da je to ispravno uvjerit će se tako što svako tko posjeduje Britanski Pasoš, ako ode i zatraži da iznajmljuje bilo koji britanski community centar u gradu, morat će da to plati, a kako je to regulisano pravilnikom toga centra. U ovome društvu sve se plaća i nema privilegovanih.

Iz Moga Uglu...

Imati mišljenje kao samosvjesno biće je odraz potrebe izražavanja i zdravog razmišljanja ali za nešto više to

nije sasvim dovoljno, jer mišljenje može svako imati. Imati ideju je samo početna pretpostavka o mogućnosti promjena samoga sebe, grupe kojoj osjećaš da pripadaš ili nešto drugo promijeniti, unaprijediti ili pak srušiti, ako za to postoji grupni ili društveni interes, odnosno ako se pojedinačna ideja materijalizuje u dobar ili loš projekat za koga naravno trebaju postojati i druge dodatne pretpostavke.

A da li je naša ideja i naše mišljenje koje izražavamo u liniji sa onim što bi moglo pomoći ili odmoći ljudima u nekoj daljoj ili bližnjoj budućnosti, ili uopšte promijeniti, ili je to samo "nešto naše lično, naš stav", pitanje je sa puno odgovora? Kako je čovjek društveno biće, time se stvara potreba udruživanja u grupu zbog sličnosti, straha ili zajedničkog interesa. Grupa funkcioniše u skladu sa zajedničkim interesima, slobodno i ravnopravno ili nekada pojedinac obrazuje i manipulira grupom kao sopstvenim dostignućem ili ciljem u svrhu uzdignuća samoga sebe, ili u namjeri da zaštiti sebe i druge ili da nametne svoj stav i svoje mišljenje ili samo usljed nedostatka "toga drugoga suprotnog načina mišljenja" a što se na kraju javlja kao karakteristika te grupe koja je često slična karakteristikama lidera.

U najčešćem slučaju javlja se veoma puno različitih grupa sa puno različitih interesa, što često dovodi da su interesi grupa na prvi pogled totalno različiti a u stvari imaju jako puno sličnosti jer je suština da je većina grupnih interesa zajednička, ali se zbog ličnih principa insistira na onim malim razlikama i od njih se prave "događaji". Problem je u nepotpunom shvatanju i prihvatanju suštine ciljeva druge grupe ili pojedinca, odnosno nedostatak tolerancije potrebne za suživot, napredak a nekada i opstanak.

Otuda i dolazi do nerazumijevanja, odnosno nepoznavanja suštine interesa onoga drugoga ili one druge grupe te onda onaj drugi postaje nešto što je suprotno našem grupnom ili nametnutom načinu razmišljanja i shvatanja a u krajnjoj instanci dovodi do neslaganja a time stvaranja otpora promjenama koje se dešavaju ili će se desiti u skoroj ili daljoj budućnost kako u sopstvenoj grupi tako i u grupama u okruženju. Tendencija suživota i razvoja proizilazi iz pojedinačnih interesa i ciljeva koji se prevode u grupne a onda grupni kroz usaglašavanje i uzajamno poštovanje dovode do formiranja društva i funkcionisanja čitavog sistema a time i šireg društvenog interesa.

Stoga je veoma bitno shvatiti interes pojedinca u grupi i interes same grupe kao i interes grupa u okruženju. Potrebno je poštovati raznolikost strukture i raznolikost ideja i mišljenja što je suština jednakosti građana, odnosno shvatiti da prava i obaveze idu uporedo. Takođe, u isto vrijeme nije preporučljivo nametati razmišljanje pojedinca i ideje pojedinca ili grupe kao jedino ispravno i kao neko opšte pravilo za sve pojedince i sve grupe, jer krajnji rezultat toga je totalizam i jednonumlje koje ne koristi svim ljudima nego pojedincu samo ili izabranoj grupi. Samo različitost ideja, kultura, religija, razmišljanja, porijekla obogaćuje ljudski um i pospješuje život pojedinca i društva a što je najveće bogatstvo i zajednice i društva u cjelini.

Ferid Kevrić

DAN NEZAVISNOSTI BOSNE I HERCEGOVINE



Učenici bh. Dopsne škole iz Coventry-a

Bosansko-Hercegovačko Udruženje Derby, u suradnji sa Bosansko-hercegovačkim Udruženjem Coventry, 3. Marta 2018. godine organizovalo je proslavu povodom obilježavanja Dana nezavisnosti Bosne i Hercegovine.

1. mart se obilježava kao Dan nezavisnosti Bosne i Hercegovine još od 1992. godine. Naime, 29. februara i 1. marta 1992. godine, u Bosni i Hercegovini, održan je referendum o nezavisnosti Bosne i Hercegovine od SFRJ. Većina Bosanaca i Hercegovaca izjasnila se tada pozitivno - glasali su za demokratsku i nezavisnu Bosnu i Hercegovinu, državu ravnopravnih građana.

Prostorije Bosansko-hercegovačkog Centra Derby bile su ispunjene već od 11 sati kada su se domaćinu pridružili gosti iz Coventry-a a bogat program koji su nam pripremili učenici Dopskih Škola iz Derby-a i Coventry-a počeo je oko 11:30 intoniranjem himne Bosne i Hercegovine, prije koje su se prisutnima prvo obratili predsjednici gore navedenih udruženja,

Nermina Webster (Derby) i Remzudin Alihodžić (Coventry).

Nakon programa, ljepšoj polovini su uručeni karanfili povodom 8. Marta, dana žena, a potom je uslijedio kviz za sve polaznike gore navedenih Dopskih Škola dok su odrasli mogli da se druže u odvojenoj prostoriji.

Za nastavak dobrog raspoloženja potrudile su se naše vrijedne domaćice koje su i ovaj put nadmašile sva očekivanja nudeći sva ona jela koja pripadaju prostorima drage nam domovine.

POSJETA BH. DOPUNSKOJ ŠKOLI B'HAM



Zajednička fotografija ispred Bosanske Kuće

Krajem Marta, BH UK Network organizovalo je druženje prepuno pozitivne energije kako za učenike tako i za članove BH udruženja Derby i Birmingham. Druženje se održalo u prostorijama Bosanske kuće koje su u podnevnim satima bile ispunjene radošću i žuto plavim bojama naše drage BiH. BH Udruženje Derby se zahvaljuje domaćinu na lijepom dočeku i izuzetno dobroj organizaciji.


The Derby Bosnia-Herzegovina Community Association

Bosnia & Herzegovina Centre
99 Curzon Street
Derby, DE1 1LN

Phone: 01332 294436
Fax: 01332 293772

E-mail:
bihcommderby@hotmail.com

Web:
www.bihcommunityderby.co.uk

 **Bosnian Centre Derby**

